


Miralem  
RESULOVIĆ

# ZVUČI *moga kraja*



Miralem RESULOVIĆ

**Zvuci moga kraja**

Izdavač:  
*Miralem RESULOVIĆ*

Urednik:  
*Bajro PERVA*

Recenzija:  
*Selman SELHANOVIĆ*

Lektor i korektor:  
*Fatima ALIHODŽIĆ*

Dizajn i tehničko uređenje:  
*Safer MUMINOVIĆ*

Ilustracije:  
*Ahmet MUMINOVIĆ*

Štampa:  
*Štamparija NEDIB*

Za Štampariju:  
*Nedib PROZORAC*

CIP - Katalogizacija u publikaciji  
Nacionalna i univerzitetska biblioteka  
Bosne i Hercegovine, Sarajevo

821.163.4 (497.6) - 1

**RESULOVIĆ, Miralem**

Zvuci moga kraja / Miralem Resulović ;  
(ilustracije Ahmet Muminović). - Sarajevo :  
autor, 2009. - 48 str. : ilustr ; 21 cm

ISBN 978-9958-891-04-5

COBISS.BH - ID 17662214

Miralem RESULOVIĆ


# **Zvuci moga kraja**

Sarajevo, 2009.

# Sadržaj

ISKRA ŽIVOTA .....	7
MIRIS JUGA.....	8
LEDENI ČAS .....	9
BIJELE RUŽE.....	11
VAPAJ .....	12
FAHROV NAR.....	13
AZARU - ŠEHIDU MOSTARSKOME.....	14
HURAKAN .....	17
ADILA .....	18
NEVJERA.....	21
TREBINJE RODNI GRADE.....	22
MOJA DOMOVINA .....	24
SEVLIIJA .....	25
MOSTARSKE NOĆI .....	27
TAMNICA .....	28
NOSTALGIJA .....	29
NITI POVJERENJA .....	31
MIRIS DUŠE .....	32
ČEŽNJA.....	33
ZVUCI MOGA KRAJA .....	35
LABUDOVA PJESMA.....	37
FATIMA .....	38
GACKO POLJE .....	40
ĐULISTAN .....	43
OPERACIJA .....	44
Recenzija .....	45





# ISKRA ŽIVOTA

Dan kada u san hodi  
pod zvjezdani se jorgan svije  
mlad mu mjesec na straži stoji  
nad usnulim gostom svu noć bdije

Treperi tama beskrajnim svodom  
Munja oblak žestoko bode  
Blijed meteor ko suza kanu  
Izmamljen uzdah za njim ode.

Na obzorje vedro rumen sipi  
Pomoli dan čedan ko melek  
Otperja tama nebo izroni  
Odbrodi sunce na put dalek.

Svjetlost tminu za tren pomete  
Trepereć pred njom ko pjena na vodi  
Na izdisaju bitka zamirisa sreća  
U njoj se život vječno sadi.

## MIRIS JUGA

Kada me povedu puti kud sam rođen  
U okrilje juga moje domovine  
Kao laste tu ću boraviti  
Nek izroni duša iz tuđinske čamotinje.

Kad mi lahor želju zagolica  
Spustit cu se u Srebreno na more  
Da ne sanjam čemernu tuđinu  
Gdje snjegovi pljušte od noći do zore.

Živim za to nebo i blistavo sunce  
Što na modrom svodu kao alem sja  
Vedre noći jorgovan cvate  
Moja Bosna to je džennetski gaj.




## LEDENI ČAS

U ovom gradu na rubu svijeta  
Svijetluca čirak doma mog  
Praznina sipi bez bližnjeg svoga  
Takav mi usud dade Bog.

Tiho kljeca salgija na zidu  
Kao da mi broji zadnji čas  
Doći će neki pogrebni ludak  
Da za sebe priušti nekakav spas.

Hladna dolina usred grada  
Smrtnim biljurom vječno se kiti  
Hitro će ljudi spustiti tabut  
U tuđu me zemlju zauvijek skriti.

Majka će Bosna vječno suzit  
Za svojim čedom kojeg tuđina popi  
Ovaj će kabur na tuđoj meri  
Ko pahulja sniježna - za tren se stopit.



## BIJELE RUŽE

Ne berite bijele ruže  
Što no bajan miris šire  
Milujte ih vedrim okom  
Ko lahori kad zapire

U dalekoj tuđoj zemlji  
Bijele ruže ne mirišu  
Razuđene ko pahulje  
Nostalgiju vječno sišu

Ne berite bijele ruže  
Kada bajan miris šire  
Milujte ih svojom dušom  
Miruh Bosne one mire!

# VAPAJ

Prognana bol  
Rastače se  
Iz izvora  
Te ponire  
U sred tamnih  
Beskrajnih dubina  
Ova razjularena  
Vremena  
U čemeru čuče  
Tuđina plete strpljenje  
Koje bešumno  
Izdiše.

## FAHROV NAR

Sa nara se slavuj oglasio  
Butum sabah pjesmom obojio  
Krhki zefir grane mu ljuljao  
Ko biserna harfa grimiz lišće sviralo.

Širila se melodija skladna  
Niz sokake kršnog kraja moga  
Ni Šopen je ne bi tako uskladio  
Niti pjesnik s endeluskih dvora.

Slušao sam tu divnu melodiju  
U mirisnom hladu bijelih bagremova  
Nemade je kogod osluhnuti  
Sem vedra jutra i čardaka samotnoga.

Kad je slavuj pjesmu ispjevao  
Niz potok se dvaput placaknuo  
Sa vrbaka naklon mi učinio  
U nebeske se krošnje sirotan vinuo.


Sam nar osta kao pusto more  
I zefir se iz njeg izvukao  
Gazde nema niti jedne zore  
Tude se je pjesme odveć privikao.



# AZARU - ŠEHIDU MOSTARSKOME

Iz mezara tvoga  
Ljiljan je niko  
Na nišanu harf  
Usne mi stisko  
Ne mogu da čitam  
Čiji je kabur  
Šehid tu leži  
Učiniću sabur  
A srce tuče  
Čujem mu ritam  
Da proučim dovu  
Otvaram kitab

Azare sine  
Živote moj  
Fatihu ti učim  
Za rahmet tvoj  
Babo ti šalje  
Puno selama  
Od tvog Amera brata  
I mnogo jarana  
I ljubavi tvoje  
Lijepe Esme  
Samotna sad sjedi  
Kod stare zasadske česme  
Iščekujući tebe  
Kada ćeš joj doći  
Da li će joj i ovaj akšam  
U osami proći.



# HURAKAN

Ponad Hurona tamni oblak jezdi  
Uzavreli vali od hridi se krše  
Mjesečeva sjena ispijena hudi  
Tajni eglen par galeba skriše.

Razjarena lokva plavetnilom ljulja  
Kao da je nebo posrnulo na zemlju  
I sva tmina ovog dunjaluka butum  
Mramoraste stubi sve pred sobom melju.

Ribareva kuća obalom se vere  
Jedan viti čempres sćućuren od straha  
Izgladnjela vidra pod njim ribu delje  
Pred Božijom moći u sred živa praha.

Svi čadori drhte od tog crnog vrača  
Sve što se miče u trapove bježi  
Orli ponad svega vješto muškost pletu  
Oko srca jeza sve te više steže.

Guste noći sipe podno razvaljena grada  
Ko proboden junak jecala je tama  
Zacvokota pustoš na samotnoj meri  
Ljudske duše pokri i pepo irana.

## ADILA

U sabah se Murat-beg šetao  
Niz Trebinjsko polje  
Pa kod sada Suljagina  
Lijepu Adilu sreo.

Poranila lijepa Adila  
Kuda hodiš rano  
Il ob'laziš zreo bostan  
Il te sanak izdao.

Ne pitaj me Murat-ago  
Kud me noge nose  
Sinoć me je hrsuz Ahmo  
Isprosio za se.

Sad sam tužna i nesretna  
Ne želim za Ahmu  
Zimus sam se obećala  
Sa Gradine Muju.




Naljuti se Murat-aga  
Te zametnu Adilu  
Odnese je preko rijeke  
U gomiljansku Koča kulu.

Svi žandari pohitaše  
Da vrate Adilu  
Ali moćni Murat-aga  
Ne haje za silu.

Narednik je pit'o Adu  
Da l' će s njima poći  
Njen je babo dao ferman  
Mora odmah doći.

Vodite me mome Muju  
Tako vam Allaha  
Na oči ja ne sm'jem babu  
Mati mi je jemin dala.

Ode Mujo kod Adile  
Dode joj na dvore  
Te podrepaš haman postade  
Tako ljudi zbore.



# NEVJERA

Noćas se nebo kali  
Nad pučinom sinjeg mora  
Sa njeg padaju sićušne zvijezde  
U naručja rumenih zora.

A brodicu dalge biju  
Po palubi kabo se skita  
Ozebli galeb na pramcu  
Stade barbu da pita.

Hej starino tako ti lađe  
Istom želim da znadem  
Ovo sinje duboko more  
Koliko kora imade.

Galebu dragi, prijatelju stari  
Po njemu sad nebo gromove sadi  
Te mi lađa po žeravi luta  
A sirotan mjesec iz njeg zvijezde vadi.

Bezdušna holuja smoždi lađu  
Nebeska sila u jedrima zasta  
Izmaknu galeb panično u žalu  
Brodica i barba u dalgama nesta.

# TREBINJE

## RODNI GRADE

Trebinje moj voljeni grade  
U tebi sam sretan bio  
Od rođenja te nikad nisam  
Jednog trena napustio

Trebišnjica sad ti mazi  
Pusti bedem starog grada  
Bez munara što si bolan  
Svud po tebi pustoš vlada

Osman-pašin trg prozvaše  
Travunijom koje nema  
Ni mostovi tvoji nisu  
Begovina u pepelu drijema

A platani stari viti  
Tužni su bez Bošnjaka  
Pod njima se sada hlade  
Stranci sa istoka

Tvoj Leotar nek te čuva  
Nek izdrži sve tegobe  
Doće neko bolje vrijeme  
Otperjat će te spodobe.



# MOJA DOMOVINA

U srcu Balkana  
Ima zemlja stara  
Bosancima mila  
Bosna i Hercegovina

Dok po svijetu hodim  
Za njom suze ronim  
Vječno nek je živa  
Draga mi domovina.

Una nas milosti  
A Drina sokoli  
Bosna dušu liječi  
Vodeći nas zajedničkoj sreći.


# SEVLIJA

Sevlija jedna u majke  
Što rano rani na bunar.

U ruc joj ibrik bakreni  
A na glavi đugum srebreni.

Momče je niz sokak hodilo  
Taze joj vodu iskalo

Ne idi meni Jusufe  
Gleda nas babo s čardaka.



# MOSTARSKE NOĆI

Sjećaš li se kad smo ljetos  
Mjesečinu htjeli brati  
Iz njedara tvojih bujnih  
Ašik zvijezdu izbaviti.

Iza gustih mušebaka  
Srce ti je zaigralo  
Te nevještoj mojoj ruci  
Dopustit se nije dalo.

A i tvoja hitra nana  
Primaknu se sa čirakom  
Da otjera noćnu moru  
Što kidiše tajnim mrakom.

Tmina hudi u halvatu  
I satire snove moje  
Da l' će naše sunce granut  
Što u akšam zaspalo je.

## TAMNICA

Predvečerje ovo krhko dođe  
Sanjiv mjesec u oblake sjeo  
Te se moli sabahu zínceli  
Da odagna taj maveni veo.

Krik sokola sa visoka klisa  
Podera mehku jutarnju tišinu  
Vapaj stenje iz spaljena gaja  
Bezdušno bježeć u iskopnjelu daljinu.

Obrane noći ispijene hude  
Sve se slutnje u litice sviše  
Blijedi mjesec za brda se svali  
Obrazi se crni u koštriku skriše.

Milostivo sunce osvijetli tajne pute  
Probudi zvona bezdušne strasti  
Stuli eho iz duha satanskog  
Tamnična zavjesa noćas mora pasti.




# NOSTALGIJA

Smjelo koračam zavičaju svome  
Znan mi je taj strveni put  
Sa Arslanagića mosta usred mirne rijeke  
Izgrcah nostalgiju u njen pitomi huk.

Podno moćnog kastela drevnog  
Lampioni se u vodi noću hlade  
Bijele lađe novu mladost boje  
Da berićetli ljubavi obalom zasade.

U našim kućama pored modre rijeke  
Bahata samoća po njima lelija  
Orohnuli mušebak bršljan steže  
Ko šargan ljuti dok se uz žrtvu privija.

Zamišljeno gledam tu sirotu rijeku  
Tamo kud se vječno rastače  
Odnoseć moju nostalgiju svehlu  
Iz njenih dubina merhamet plače.



# NITI POVJERENJA

Ovog tužnog dana ječi modra rijeka  
 Ponad kršnih brda mjesec bolan kunja  
 A platani viti u tamu se svili  
 Tamno nebo brodi ljuljaška ga munja.

Po kaldrmi moćnoj smrtna sjena hudi  
 Nijemo korača na prostoru svome  
 Svijeće se tule iz dubina očnih  
 Skrhana pleća i sav život klone.

Lobardaju riječi i zveket britkih noža  
 Pred hrabrim mladićem propeše se vrata  
 Ova tajna duboka i bolna  
 Trebalo je odbraniti Bošnjaka brata.

Grmi junaštvo ko grom sa visine  
 Bruji duboko u srcima časti  
 SRĐO žrtvu izvadi iz ognja  
 Zbog takva čojstva, zar je mor'o pasti.

Ova pjesma posvećena je pok. Srđanu Rada  
 Aleksiću koji je, braneći svog sugrađanina  
 Trebinjca – Bošnjaka, koji je bio napadnut od  
 nekih paravojnih lica, izgubio svoj mladi život.

## MIRIS DUŠE

Divna ledi Magdalen  
Dušom plijeni cio svijet  
Na grudima joj poji golub bijeli  
Da mir ima svijet cijeli.

Njen blag pogled nebom plovi  
Rječitom putem u sklad krene  
Ranjenom srcu mehlem nudi  
Da iz njeg odagna olovno breme.

Sad moj narod svako šiba  
Za njegov dušom pravi hlada  
Sve nevolje podanj skupi  
Da mu bude spas i nada.

Divna ledi Magdalen  
Umom plijeni čitav svijet  
Na grudima joj poji golub bijeli  
Da mir poštuje svijet cijeli.

## ČEŽNJA


Moje misli u sidžir se vežu  
Pusta čežnja ranjen mozak lomi  
Bol i slutnja u beznađu se mole  
Da se tijelo s' dušom rodnoj grudi vrati.

Kuća naša na samoću tukne  
Staru lomužu ljuti šargan čuva  
Pelin travu što po kršu raste  
Garav bakrač mehlem što se kuha.

Ćiler mračni našu ruku treba,  
U njemu je babo kukuruz kominjo,  
Badanj je iz ćoška na po oka gled'o,  
iz njega je ječam poput suza tek'o.

U seharu trošnu puste snove slažem  
Serdžada ih mehka od uroka pazi  
Da sindžir izdrži misli u tegobi  
Dok se prognan Bošnjak rodnoj grudi vrati.





## ZVUCI MOGA KRAJA

Srebren talas pod kulinom šapće  
Šušti vrba tonovima tajnim  
Pod nju galeb nasumice sleti  
Mirisom ga mame raspjevani vali.


Ah ti zvuci kršnog kraja moga  
Duboko rone u virove mrtve  
U njima se grle ko vjetрови u jedru  
Dok brodicu mornu svu noć tuku bitve.

Drhti jutro na zapaljenom brijegu  
Kroz oblake tanke umiveno sunce viri  
Iz daljine huka nanovo se čuje  
Virtuozno munja nebeske čari širi.

Skrivena pod vrbom drhti bijela ptica  
I sve njene slutnje ljuljaškaju vali  
Prosu magla kose po brdima britkim  
Grandiozna duga za pleća im se svali.

Na strvene ploče staroga sokaka  
Sipi bijeli jasmin behar miršljavi  
Sabah žali sve tegobe tajne  
Ušunja se u halvat pusti preorani





# LABUDOVA PJESMA

Na obali Antalntika  
Moli momče labuda  
Ponesi me bijela ptico  
Do zlatnoga mjeseca.

Daleko je mjesec momče  
Labud njemu veli  
Evo tebi alem kamen  
Koji svijetli, bezbeli.

Nek obasja tvoje tamne pute  
Iz gluhe tuđine  
Da ne skrivaš svoje gnijezdo  
Pod tuđinske hridine.

## FATIMA

Lahori teku niz sedefna polja  
Trebinjski dolapi sumorno ječe  
Melodija skladna sa jablana vitih  
Razgali ovo čemerno veče  
Vidis li Fatima  
Kako mi suze padaju  
Za tvojom prognanom sjenom  
Tamna se meleća obaraju.

U starom čardaku sahat  
Naša jutra ne budi  
I džezva se u budžaku  
Butum zauvijek ohladi  
Vidiš li Fatima  
Kako rosa sumbul miluje  
Kako se tvoj đulistan  
Novom proljeću raduje.



Mog ranjenog srca zebnja  
U samoći boluje  
Ponad našeg samotnog doma  
I mjesec za tobom tuguje  
Vidiš li Fatima  
Kako zvijezde u sabah padaju  
Za tvojom prognanom dušom  
Tamna se meleća prolamaju.

## GACKO POLJE

Gacko polje rosom se umilo  
Pod šaren ćilim drevni ključ sakrilo  
Od Fazlagića kule mjesec pomolio  
Zlatnom lađom ka Lipniku zaplovio.


Iz nebeske okovane lađe  
Mlad gazija na stepenu side  
Da pust i spaljen Lipnik  
Željno mahsus obide.

Hude kule u trnovitom obolu  
Iz njih pusti zeher bije  
O Smail-ago Čengiću  
Tvoj ti narod svako progoni i bije.

Gazijo Derva dedija Tanoviću  
Je l' ti džennet okusila duša  
Koji li je stepen dokučila  
Il zlotvore po pustom polju pusa.

Gondola se kod Cernice usidri  
Da carini žuti dukat daje  
Pred portom se trn zakotio  
Iz nje odron kao suza pade.

Na pustom polju cvijetne dalge pljušte  
Nikog nema da ih uzdom kroti  
Po drevnom Ključu ljuta kopriva klija  
Kapetanov mezar čuva poskok zmija



## ĐULISTAN

Sjajni mjesec pomolio  
Na nebeske kanate  
Pred sabah obasjao  
Butum dunjalučke bašte.

Sve su đule procvale  
Kod bijelog jasmína  
Iz ibrika ih zalijevala  
Lijepa Medina.

I boja dana procvala  
Kao sumbuli plavi  
Rosa ga raznježila  
Na berače se žali.

Nemojte me močiti  
Ni u sabah brati  
Đulistan će cvatiti  
I vašu dušu hraniti.



## OPERACIJA

U utrobi mojoj čemer klija  
Sijan ralom uvezena straha  
Ranjenu dušu šubha steže  
Da ne posrne usred tuđeg mraka.

Izvire nada iz britka noža  
Kida se progon iz smrtna obola  
Da li je vjera u onoj ruci  
Sa koje se šubha nije odagnala.

Čvrst je razum u susjeda moga  
Da otoci moru iz bolna mijeha  
Prozbori duša sa zdravim umom  
Krv je crvena kod svakog čovjeka.

Recenzija knjige "Zvuci moga kraja"  
autora Miralema Resulovića

## ***Uzvišena sjeta***

I četvrta po redu knjiga pjesama Miralema Resulovića odiše prepoznatljivim žalom za izgubljenim danima i rodnom grudom kao i vapajem koji u ovim stihovima pronalazi svoje ovaploćenje i utjehu. Pjesme su tu, u svakom slučaju, da sažmu bol i da unekoliko ublaže osjećaj usamljenosti koji u dalekom svijetu, u Kanadi gdje sada Resulović živi, biva sve izraženija i tegobnija. U tom smislu Resulovićevi stihovi su tu da krijepe dušu i da u osjećanjima vezanim za rodni toprak i Trebinje pronađe "iskru života", pronađe ljepotu i dobrotu koju je ne svojom voljom morao ostaviti. U "tuđinskoj čamotinji" gdje "praznina sipi", u osami, on žudi za blistavim suncem i vedrim noćima. Rekli bismo, pjesnik svoju stvarnost traži i proicira gradeći sliku sačinjenu od sjećanja, mirisa i zvukova svog

zavičaja. Nosiva pjesma "Zvuci moga kraja" progovara o tome i nadrasta samu sebe. Čak i priroda u njoj izlazi iz svojih okvira i stapa se u pjesmu, u osjećaj koji lebdi iznad nas. On stihuje: "Drhti jutro nad zapaljenim brijegom", te dodaje "Sabah žali sve tegobe tajne/ Ušunja se u halvat pusti, preorani".

Riječ je o refleksivnoj lirici u kojoj Resulović oživljava davne čežnje tvoreći idilične slike protkane sanjalačkim i emotivnim valerima. Njegov stih je tankočutan i blag, gotovo djevojački nježan. Poslušajte stihove: "Lahori teku niz sedefna polja/ Trebinjski dolapi sumorno ječe/ Melodija skladna sa jablana vitih/ Razgali ovo čemerno veče" (pjesma "Fatima"). I, u ovoj pjesmi kao i drugima, pored melodioznosti i uzvišene sjete, otkrićemo turobnu zvučnost (sumorno i čemerno). Kao da priroda učestvuje u pjesnikovim intimnim košmarima. Idilični mir je narušen već samim povijesnim usudom. Moralne vrijednosti u novom okrutnom svijetu više ne važe. U pjesmi "Niti povjerenja" Resulović nalazi za shodno da opiše detalj koji je označio kraj jednog života i bitno promijenio sud-

binu Trebinja. Braneći svog sugrađanina Bošnjaka čojstveni Srđan je stradao od svojih sunarodnjaka. Taj čin zaslužuje da se u pjesmi ovjekovječi i da bude za nauk. Otuda, ova pjesma ali i ostale, mogu se posmatrati i kao Resulovićevo osobno zavještanje u ime trajnih ljudskih vrijednosti.

Između jednog takvog ubjeđenja i patnji kroz koje čovječanstvo prolazi, s jedne strane, i s druge iskrenih osjećanja, Resulović je u svom pjesničkom istrajavanju svjestan da je u trci za vremenom čovjek neizostavno na gubitku. Stihovi su tu da opomenu i vrate nas nama samima.

Na kraju istaknimo lijepe kovanice poput "otperja tama", "odbrodi sunce" ili "uzavreli vali" koje već same po sebi mogu biti preporuka da se ova knjiga štampa.

Sarajevo, 25.09.2009.god.

Selman Selhanović



## **Miralem Resulović** je

rođen u Trebinju. Osnovnu i srednju školu završio je u svom rodnom gradu, a pravni studij u Splitu (Hrvatska). Tokom minulog rata protjeran je iz svog rodnog grada. Trenutno boravi u Kanadi. Još u



ranoj mladosti bavio se pisanjem poezije. Sada u mauhadžirluku intenzivnije piše i opisuje bremenita vremena u Bosni i Hercegovini. Pjesme nastale u ovom vremenu objavljuje u listovima "Šabah" i "Izvor" koji izlaze u dijaspori (SAD i Švedskoj), te "Preporodu".

Objavio je knjige poezije "Izbjeglička tuga" i "Na kraju svijeta", a "Zvuci moga kraja" mu je četvrta knjiga.